

五朝名臣言行錄

二

五朝名臣言行錄

PDG

二之四

太尉魏國王文正公

公名旦字子明魏州人中進士第知平
江縣通判鄭州拜右正言知制誥趙昌
言叅知政事公其子壻也表請辭職改
集賢殿修撰昌言罷乃復舊職 眞宗
即位爲翰林學士咸平四年拜工部侍
郎叅知政事景德三年遂進拜同平章
事從封泰山祀汾陰兼玉清昭應宮使
又爲迎奉聖像天書刻玉兗州太極觀

奉太尉兼侍中五日一朝視事遇軍國重事不以時入叅決以疾懇辭冊拜太尉王清昭應宮使是年九月薨年六十一乾興初詔配享真宗廟庭仁宗篆其碑首曰全德元老之碑且詔史臣歐陽脩銘之

王晉公祐事太祖爲知制誥太祖遣使魏州以便冝付之告曰使還與卿王溥官職時溥爲相也蓋魏州節度使符彥卿

太宗夫人之父有飛語聞于上祐往別
太宗於晉邸太宗却左右欲與之語祐
徑趨出祐至魏得彥卿家僮二人挾勢恣
橫以便宜決配而已及還朝太祖問曰
汝敢保符彥卿無異意乎祐曰臣與符彥
卿家各有百口願以臣之家保符彥卿又
曰五代之君多因猜忌殺無辜故享國不
長願陛下以爲戒帝怒其語直貶護
國軍行軍司馬華州安置七年不召太
宗即位以兵部侍郎召不及見而薨初祐

赴貶時親賓送於都門外謂祐曰意公作
王漕官職矣祐笑曰祐不做兒子二郎必
做二郎者文正公旦也祐素知其必貴手
植三槐于庭曰吾子孫必有爲三公者已
而果然天下謂之三槐王氏云

聞見錄

文正公通判鄭州建言請天下置常平倉以
抑兼并爲人嚴重能任大事避遠權勢不
可干以私爲學士時嘗奏事退上目送
之曰爲朕致太平者必斯人也錢宣靖公
名知人常稱公有宰相器上嘗問以羣

臣可大用者錢以公對 上曰吾固已知之矣遂以爲叅知政事

公扈從在澶淵雍王元份留守得暴疾命公代之公曰願宣寇準來臣有所陳準至公奏曰十日之間未有捷報時當如何 上

良久默然曰立皇太子

遺事

上在澶淵遣公還守東都既至直入禁中下令甚嚴使人不得傳播後車駕自河北還公家人及子弟輩皆出迎於郊外忽聞後有呵喝之聲驚而視之乃公也其處事謹

密如此

遺事

公與人寡言笑其語雖簡而能以理屈人默然終日莫能窺其際及奏事上前群臣

異同公徐一言以定今上爲皇太子太

子諭德見公稱太子學書有法公曰諭德

之職止於是耶

歐公撰神道碑○又遺事云張士遜言皇太子學書甚好公曰

皇太子不待應舉選舉士去不必學書由是文懿日以善道規贊皇太子

趙德明言民飢求糧百萬斛大臣皆曰德明

新納誓而敢違請以詔書責之真宗以

問公公請勅有司具粟百萬於京師詔德

明來取 真宗大喜德明得詔書慙且拜

曰朝廷有人

神道碑

契丹奏請歲給外別假錢幣 上以示公公

曰東封甚近車駕將出以此探朝廷之意

耳 上曰何以荅之公曰止當以微物而

輕之也乃於歲給三十萬物內各借三萬

仍諭次年額內除之契丹得之大慙次年

復下有司契丹所借金帛六萬事屬微末

仰依常數與之今後永不爲例

遺事

大中祥符中天下大蝗 真宗使人於野得

死蝗以示大臣明日他宰相有袖死蝗以進者曰蝗實死矣請示於朝率百官賀公獨以爲不可後數日方奏事飛蝗蔽天

真宗顧公曰使百官方賀而蝗如此豈不

爲天下笑邪

神道碑○又遺事所載與此同但云諸公皆謝曰王旦遠識非臣等所及

公但歛容退身而已

官者劉承規以忠謹得幸病且死求爲節度使真宗以語公曰承規待此以瞑目公執以爲不可曰他日將有求爲樞密使者奈何至今內臣官不過留後

神道碑

薛簡肅公天禧初爲江淮發運使辭王文正公王無他語但云東南民力竭矣薛退而謂人曰真宰相之言也

湘山野錄

張士遜出爲江西轉運使辭公於政事堂且求教公從容曰朝廷推利至矣士遜起謝後迭更是職思公之言未嘗求錐刀之利識者曰此運使最識大體

遺事

景德中李迪賈邊皆舉進士有名當時及就省試主文咸欲取之旣而二人皆不與取其卷視之迪以賦落韻邊以當仁不讓於

師論以師爲衆與注䟽異說乃爲奏具道所以乞特收試時王文正公爲相議曰迪雖犯不考然出於不意其過可恕如邊特立異說將令後生務爲穿鑿漸不可長遂收迪而黜邊

國朝事實

宮禁火災公馳入對上驚惶語公曰兩朝所積朕不妄費一朝殆盡誠可惜也公對曰陛下富有天下財帛不足憂所慮者政令賞罰有所不當臣備位宰府天災如此臣當罷免繼上表待罪上乃降詔罪

已許中外上封事言朝政得失後有大臣
言非天災乃榮王宮失於火禁請置獄出
其狀當斬決者數百人公持以歸翌日乞
獨對曰初火災 陛下降詔罪已臣上表
待罪今反歸咎於人何以示信且火雖有
迹寧知非天譴邪果欲行法願罪臣以明
無狀 上欣然聽納減死者幾百輩

遺事

公在昭應宮齋宿寶符閣役工有墜死者公
得報繳奏曰 陛下崇奉上靈爲民祈福
今反傷民損財豈合天意乞諭有司省工

惜費

遺事

石普知許州不法朝廷議欲就劾公曰普本武人不明典憲恐恃薄效妄有生事必須重行乞召歸置獄乃下御史俟普至按之一日而獄具議者以爲不屈國法而保全武臣真國體也

遺事

公任事久人有謗公於上者公輒引咎未嘗自辨至人有過失雖人主盛怒可辯者辯之必得而後已日者上書言宮禁事誅籍其家得朝士所與往還占問吉凶之說

真宗怒欲付御史問狀公曰此人之常情
且語不及朝廷不足罪 真宗怒不解公
因自取嘗所占問之書進曰臣少賤時不
免爲此必以爲罪願并臣付獄 真宗曰
此事已發何可免公曰臣爲宰相執國法
豈可自爲之幸於不發而以罪人不真宗
意解公至中書悉焚所得書旣而 真宗
悔復馳取之公曰臣已焚之矣由是獲免
者衆

神道碑

上出喜雨詩示二府公袖歸諭同列曰上

詩有一字誤寫莫進入改却王欽若曰此亦無害欽若退密奏之翌日上怒謂公曰昨日詩有誤字何不奏來公再拜謝曰臣昨日得詩未暇再閱有失奏陳不勝惶懼諸公皆再拜獨樞密馬公知節不拜具以實奏又曰王且略不辯真宰相器也

上顧公笑

遺事

中書有事關送密院事礙詔格寇萊公準在樞府特以聞上以責公公拜謝引咎堂吏皆遭責罰不踰月密院有事送中書亦

違舊詔堂吏得之欣然呈公公曰却送與
密院吏出白冠公冠公大慙翌日見公曰
同年甚得許大度量公不荅

名臣遺事○又龜山語錄云昔

王文正在中書寇萊公在密院中書偶倒用了印萊公須勾吏人行遣它日密院亦倒用了印中書吏人呈覆亦欲行遣文正問吏人汝等且道密院當初行遣倒用印者是否曰不是文正曰既是不是不可學他更不是更不問

王欽若陳堯叟馬知節同在樞府一日上
前因事忿爭上召公公至則見欽若諠
譁不已馬公流涕曰願與王欽若同下御
史府公廼叱欽若曰王欽若對上豈得如

此下去 上大怒乃命下獄公從容曰欽
若等恃 陛下顧厚上煩 陛下譴訶當
行朝典然觀 陛下天顏不怡願且還內
來日取旨 上許之翌日 上召公問欽
若等事當如何公曰欽若等當黜然未知
坐以何罪 上曰朕前忿爭無禮公曰
陛下奄有天下而使大臣坐忿爭無禮之
罪恐夷狄聞之無以威遠 上曰卿意如
何公曰願至中書召欽若等宣示 陛下
含容之意且戒約之俟少間罷之未晚